

# 'Jangan peram pemain'

## BAM perlu 'celik' dengan bakat yang ada: Zolkples

Oleh Mohd Fitrie Muhamad  
mfitrie@bharian.com.my

**J**ANGAN peram pemain! Mungkin itulah kesimpulan ringkas yang dapat diberikan Ketua Pengarah Majlis Sukan Negara (MSN), Datuk Zolkples Embong terhadap situasi yang sedang dihadapi sukan badminton sekarang.

Selepas rentetan kegagalan skuad negara termasuk di Piala Thomas di Wuhan lalu, Zolkples menuntut Persatuan Badminton Malaysia (BAM) jangan mudah memberi alasan sebaliknya perlu 'celik' dengan bakat yang ada pada pemain muda.

"Saya tidak tahu mengapa mereka boleh cakup macam itu. Kita ada program di negeri-negeri cuma saya rasa program ini kena diperkukuhkan dan diperkemas lagi.

"Jangan terlalu bergantung kepada pemain elit saja. Sudah banyak kali saya cakap, sekarang adalah masa untuk beri pendedahan kepada pemain seperti Zulfadli Zulkifli, Misbun Ramdan Misbun dan Iskandar Zulkarnain.

"Suka ataupun tidak, ini masa untuk kita dedahkan pemain pelapis kita yang masih muda. Ini untuk masa depan kita... bukan di Piala Thomas saja tapi juga Olimpik 2016," katanya ketika menghadiri Majlis Anugerah Sukan Universiti Putra Malaysia (UPM) ke-29 semalam.

Hadir sama, Pro Canselor UPM, Tan Sri Datuk Rozali Ismail, Naib Canselor Radin Umar Radin dan Datuk M Jegathesan. Pada majlis itu, 120 pelajar termasuk kakitangan UPM menerima anugerah atas sumbangan dan kecemerlangan mereka dalam bidang sukan.

Dalam masa sama, Zolkples mengakui untuk melahirkan pemain berkelas dunia bukan tugas mudah tetapi ia juga bukan satu perkara mustahil sekiranya bakat muda diberi perhatian penuh bermula daripada sekarang.

"Nak lahirkan seorang atlit bertaraf dunia bukannya mudah. Kita tengok Indonesia, saya rasa pemain badminton melebihi jumlah penduduk Malaysia tapi mereka masih lagi tercaricari siapa pengganti Taufik Hidayat... siapa pengganti Sony Dwi Kuncoro dan siapa ganti Simon Santoso.

"Apa harus kita lakukan adalah beri perhatian penuh kepada pemain yang sudah dikenal pasti. Bukan bermaksud kita lupakan pemain elit, khidmat mereka masih diperlukan untuk jadi rakan 'sparring' dengan pemain elit lain dan pemain muda," katanya.



### Mohd Kaharuddin, Siti Munirah pilihan UPM

OLAHRAGAWAN dan Olahragawati Sukan Universiti Putra Malaysia (UPM) ke-29, Mohd Kaharuddin Ashah (memanah) dan Siti Munirah Jusoh (skuasy) memperagakan trofi masing-masing pada majlis

penyampaian anugerah di Dewan Banquet UPM, semalam. Majlis penyampaian anugerah disempurnakan oleh Pro-Canselor Universiti Putra Malaysia (UPM) Tan Sri Rozali Ismail.